


Bantu ukir senyuman

'Operation Smile Singapore' sedang berusaha dapatkan sukarelawan pelajar dengan hasrat pupuk kesedaran tentang derita pesakit sumbing dan rekahan lelangit



MENGHARAP BELAS: Sophanit, anak Kemboja berusia tiga bulan yang ditemui Encik Justyn Olby di Sihanoukville, adalah antara pesakit sumbing yang menerima bantuan Operation Smile. - Foto ihsan JUSTYN OLBY



MENDERITA: Cu Li dilahirkan dengan bibir sumbing dan rekahan sebesar syiling 50 sen di kiri dan kanan hidungnya. Kos pembedahannya di Shanghai dibiaya Program Jagaan Sedunia Operation Smile. - Foto ihsan JUSTYN OLBY



TERSENTUH SANUBARI: Presiden Sayap Pelajar Operation Smile, Cik Ang Min Jia, dan penasihat sayap tersebut, Encik Justyn Olby, ingin mendekati lebih ramai pelajar untuk sebarkan kesedaran tentang jerih payah pesakit sumbing dan rekahan lelangit, sebagaimana terakam dalam potret misi Operation Smile ke luar negara yang ditunjukkan Encik Olby. - Foto JOHARI RAHMAT

HATI ibu bapa mana yang tidak remuk melihat cahaya mata yang dinanti-nantikan lahir dengan bibir sumbing dan rekahan pada lelangitnya.

Itulah perasaan yang memenuhi benak Encik Justyn Olby, 40 tahun, pengurus kanan dan jurufoto Politeknik Republic, ketika menerima kelahiran anak bongsunya, Natalie.

Anaknya yang kini berusia setahun setengah, dijadualkan melalui beberapa pembedahan bertahap hingga usianya 18 tahun.

Bagaimanapun, keadaan anaknya itulah yang mendekati dirinya dengan projek sokongan dan sukarela yang ditawarkan Pusat Bibir Sumbing dan Kraniofasial (Struktur Kepala, Tengkorak dan Wajah) di Hospital Wanita dan Kanak-Kanak KK.

SAYAP PELAJAR

Antara yang menarik minatnya termasuk Operation Smile Singapore, cawangan badan bantuan antarabangsa bagi pesakit sumbing dan lelangit mereka yang berpangkalan di sini.

Encik Olby menawarkan khidmatnya selaku jurufoto sukarela ke misi khas membantu kanak-kanak sumbing di Urumqi di Xinjiang, China.

Secara kebetulan, beliau mendapat tahu Operation Smile Singapore sedang mencari penasihat untuk mengerakkan sayap pelajar yang dipanggil Operation Smile Students Chapter.

Melihat pada bidang tugasnya yang banyak berhubungan dengan beliau, Encik Olby dirasakan sesuai menjadi penasihat pasukan yang kini diketuai Cik Ang Min Jia, 20 tahun, mahasiswa Sastera dan Sains Kemasyarakatan di Universiti Nasional Singapura (NUS).

Maka, bermulalah usaha sayap pelajar dengan empat anggota jawatankuasa eksekutif ini mendekati pelajar sekolah menengah, maktab rendah dan institusi pengajian tinggi dengan hasrat memupuk kesedaran mereka

tentang pesakit sumbing dan rekahan lelangit.

Sejak Februari lalu, mereka, antara lain, mendapat sokongan padu daripada Sekolah Perempuan Raffles (RGS) dan Maktab Rendah Raffles Institution RI (JC).

Malah, lewat tahun lalu, Encik Olby dan Cik Ang ke Kemboja untuk menyaksikan sendiri bagaimana pembedahan percuma ditawarkan kepada kanak-kanak sumbing daripada keluarga kurang mampu di desa-desa terpencil seperti Kampong Cham.

"Memupuk kesedaran pelajar setempat tentang situasi pesakit sumbing dan rekahan lelangit menjadi misi utama kami.

"Kami juga ingin menggalakkan pelajar mengumpul dana bagi misi-misi murni Operation Smile Singapore. Secara langsung, ia memupuk dalam diri pelajar keinginan berkhidmat, melakukan kerja kebajikan, memupuk kepimpinan diri dan mempelajari sesuatu yang baru untuk kegunaan sepanjang hayat.

"Sayap pelajar Operation Smile di Amerika amat aktif. Besar harapan kami, sayap pelajar di Singapura juga dapat dikembangkan," ujar Encik Olby.

JUALAN AMAL

Sejauh ini, sayap pelajar itu telah mengadakan jualan amal di *scape@Youth Park dan bengkel merakam video untuk menggalak pelajar mendokumentasikan apa yang mereka lihat dan lalui untuk tatapan dan pengajaran rakan-rakan sebaya.

Siapa tahu, kemahiran itu boleh dimanfaatkan Operation Smile untuk mengumpul bahan arkib sebagai rujukan pada masa akan datang.

Menerusi Pesta Muzik Ignite! anjuran Politeknik Republic, sejumlah wang juga berjaya dikumpulkan dan akan disalurkan kepada Operation Smile.

Sesetengah pelajar juga dibawa ke Hospital Wanita dan Kanak-Kanak KK untuk menjadi abang atau kakak angkat kepada pesakit sumbing dan mereka turut membantu mengendalikan sesi terapi pertuturan.

BUKA MATA

"Saya yakin penglibatan dalam sayap pelajar ini akan membuka mata pelajar tentang keadaan yang memilukan di negara-negara membangun.

"Walaupun pembedahan mengelokkan bibir sumbing dan rekahan lelangit itu percuma, tetap wujud cabarannya.

"Saya pernah terserempak seorang kanak-kanak miskin yang menjual barangan di tepi pantai tetapi tidak mampu mengorbankan dua hari untuk pergi ke hospital tempat pembedahan dibuat.

"Sebabnya, jika dia tidak berjaja selama dua hari - kerana perjalanan untuk sampai ke hospital itu saja mengambil dua hari - itu bermakna dia tidak dapat mencari wang untuk keluarganya yang sangat miskin.

"Bayangkan situasi sedemikian. Di Urumqi, mereka terpaksa mengambil masa 24 jam jika menaiki keldai, disusuli pula dengan lagi 15 jam menaiki bas untuk sampai ke hospital tempat pembedahan percuma itu dibuat.

"Dalam kami menawarkan khidmat untuk kanak-kanak, kami juga menemui seorang lelaki berusia 52 tahun yang telah lama sengsara dengan bibir sumbing-

nya. Ia benar-benar menyentuh hati saya," ujar Encik Olby lagi dengan nada sayu.

Cik Ang, bekas pelajar Politeknik Republic, akur penglibatannya dalam sayap pelajar Operation Smile ini memberinya pendedahan pada dunia sukarela.

"Sebelum ini, saya tidak terikat pada sebarang badan bantuan. Apabila saya mengusahakan laman Internet untuk kumpulan sokongan keluarga bagi pesakit sumbing untuk projek tahun akhir saya di politeknik, saya mula berminat mengetahui lebih lanjut tentang penyakit ini.

SUSAH DAPAT KERJA

"Di Kampong Cham di Kemboja, saya lebih pilu mengenangkan nasib gadis-gadis sumbing yang menghadapi diskriminasi dan payah mendapat kerja kerana paras rupa mereka. Nak kahwin pun jadi masalah besar, lantas melunturkan keyakinan diri mereka," jelasnya.

Dengan langkah pertama ini diorak, apakah rancangan selanjutnya bagi Encik Olby dan Cik Ang?

"Saya dijadualkan mengikuti satu lagi misi Operation Smile ke Uzbekistan sekitar September ini," kata Encik Olby.

Cik Ang pula menambah: "Acara besar-besaran berupa maraton dan karnival amal, *Smile for A Mile* pula dirancang RI (JC) awal tahun depan."

Pelajar yang berminat membantu Operation Smile boleh hubungi Cik Ang di minjia_89@hotmail.com

Guru-guru pula boleh menghubungi Encik Olby di 9755-6867 atau e-mel justyn_olby@rp.sg jika berminat menyertakan pelajar mereka dalam sayap pelajar Operation Smile.